

## 公開組 季軍 《離開才能回來》

Gigi (獨白):

我叫 Gigi，啱啱喺英國讀完書返嚟。呢度係我屋企，我住喺坪石邨黃石樓。

哥哥：

喂，行咁快做咩啫？你都無鎖匙嚟啦。借過啦！

Gigi (獨白):

呢個係我阿哥。平時我做咩，佢都窒頭窒勢。不過，我都知佢好錫我嘅，係無講出口咋嘛。其實我都有件事無講出口。

Gigi：

你記唔記得呢，之前麥樂雞嗰單嘢呀？

哥哥：

唔記得㗎。

Gigi：

你不撈記仇㗎㗎。

哥哥：

我咁小氣㗎咩？

Gigi：

你咁大方㗎咩？

哥哥：

哈.....

哥哥：

喂？做咩呀？

就返到嚟喇㗎，你而家先叫我去買嘢食？

喂，你唔好玩啦！

好喇，怕吓你.....

哥哥：

喂，你去邊呀？

Gigi：

我約咗 Friend 呀，你咁遲。

哥哥：

喂！你叫我買嘍喎。

Gigi：

咁我就嚟飛啦嘛。

哥哥：

我唔理呀，你點都要攞走佢呀！

Gigi：

Sorry！

哥哥：

唔記得話你知，隔離屋陳師奶搬走咗啦喎。

Gigi：

吓？仲以為今次返嚟可以見到佢添.....

哥哥：

人哋中咗六合彩呀嘛。

Gigi：

咁住得好地地，中咗六合彩又點解要搬走呀？

哥哥：

公屋嘅資源係要留俾有需要嘅人嘅。咁如果你係有錢人嘞，咁咪要搬走囉。

Gigi：

咪住先，咪住先.....我之前細個度高啲紋呢？

哥哥：

房署每幾年會做一次翻新㗎。你個啲無曬㗎啦！

Gigi：

吓？仲有我以前細個同男朋友寫過啲嘢呢？

哥哥：

咩男朋友話？寫咩嘢話？你個衰妹咁細個學人拍拖？喂，呀媽！有新聞聽呀！

Gigi：

你唔好同呀媽講啦！

哥哥：

咁大單新聞好難唔講嘅。

Gigi：

最多我請你食麥樂雞嘞。

哥哥：

我鍾意食熱香餅多啲㗎。

Gigi：

咁我請你食熱香餅加早餐。

哥哥：

一個星期。

Gigi：

一個星期。

哥哥：

不過你起到身先算啦。

Gigi：

我一定起到㗎㗎。

哥哥：

如果你咁乖嘅話，我都可以唔講嘅。

Gigi (獨白)：

曾經離開過成長嘅地方，先識得用另一個角度去睇。就算去到幾遠，我都總會返嚟，返嚟呢個充滿回憶同人情味嘅家。